

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Dampa bial by election neih turah vawiin khan postal ballot hmanga vote thlak hun hawn niin mi 10 in vote an thlak.
- 2. Lai Autonomous District Council inthlanpui neihtur chungchangah Mizoram State Election Commission hotuten Lawngtlai an tlawh.
- 3. Prime Minister Narendra Modia chuan India chu technology thar lo leitu chauh niloin hmasawnna ropui tak thlentu a ni tawh tih a sawi.
- 4. Telangana-a lirthei chesualah mi 19 an thi.

<><><>

DAMPA POSTAL BALLOT

Dampa bial by election neih turah vawiin khan postal ballot hmanga vote thlak hun hawn niin mi 10 in vote an thlak.

Postal ballot vote thlakna hi Mamita Dampa bial Returning Officer office ah vawiin dar 10 atang khan neih a ni a, election duty tura ruatte tan vawiin chauh vote thlak hun hawn a ni.

Dampa bial by election tun thla ni 11 a neih tur a inbuatsaihna chuan a vawr tawp a thleng chho mek a, Model code of conduct ah report 3 lut tawhin bawhzui mek a ni bawk.

Mamit DC office-ah hian vawiin khan Dampa bial by-election expenditure observer Shyam Kumar hoin by-election atana candidate-te sum hman dan enfel vawi hnihna neih a ni a; candidate-te sum hman dan endiknaah hian felhlel leh dik lo hmuh a ni lo.

Vawiin vek khan vote thlakna tur khawl (EVM & VVPAT)-te enfel niin, by-election atan hian polling station 41-a hman tur vote thlakna khawl 41 ruahman a nih bakah, khawl chiang lo a awm palha vote thlak a khaihlak loh nan reserved-ah khawl 41 dah a ni bawk.

Mamit Election Officer Pu Lalnunfela Chawngthu chuan Tun thla November ni 11 a Dampa bial by election neih turah chak takin inbuatsaihna kalpui mek a ni a ti a, a thusawi lo ngaithla ang.

(BYTE)

Dampa bial by election inthlan vote tla te hi November ni 14 zing dar 8 atangin Mamit DC conference hall ah chhiar tan an ni dawn a ni.

<><><>

EMPOWERED COMT ON INVESTMENT

Empowered Committee on Investment chu an Chairman, Chief Minister Pu Lalduhoma hovin CM Conference Hall-ah an thukhawm a.

Meeting-ah hian Mizoramin Investment Promotion Agency a neih ve dan tur Planning & Programme Implementation Department-in an duan chu an enho va, state dangte kalpui dan en chung a duan a nih angin han siam rem ngaite a la awm thei nia ngaih a ni.

Mizoram Special Investment Zone hmunhma tura thli thlai mek report pawh an ngaihthla a, a rang lama chinfel ni se an ti.

Mizorama thlai thar sawngbawlina din duha rawn dil company, he committee-in a lo pawm tawh leh MoU a lo ziahpui tawh te kal zel dan pawh an sawi a. Company thenkhatten hma a lakzui nghal avangin MoU leh Mizoram Industrial & Investment Policy 2025 anga sorkarin an mamawh a lo pek ve tur tihhlawhtlin dan sawiho a ni.

<><><>

SEC VISIT LAWNGTLAI

Lai Autonomous District Council inthlanpui neihtur chungchangah Mizoram State Election Commission hotute chuan Lawngtlai tlawhin, Political Party, Kohhran, Tlawmngai pawl leh Chanchinbumite, DC Conference Hall, Lawngtlai ah an kawm.

LADC Inthlanpui neih huntur tihchian la ni lo mahse, inpuahchahna kalpui mek niin, State Election Commission a Commisioner Dr. H. Lalthlanglana chuan LADC inthlan hmachhawn mek a nih thu leh tihtur pawimawhte bawhzui mek a ni a ti a, Meeting a telte ngaihdan zawtin, he huna telte chuan Kristian te hunpui, Krismas nen innang buailo zawnga Inthlanpui neih tha an tih thu an sawi a, Inthlanna felfai leh dik a awm theih nana rawtna hrang hrang awmte chu Commisioner chuan an lo ngaihtuahzui tur thu a sawi.

Dr.H.Lalthlanglianachuan Inthlanpui tluang taka neih a nih theih nan Political Party, Tlawmngai pawl, Kohhran leh Chanchinbumite an pawimawh takzet tih sawiin, MPF leh Tlawmngai pawl te hmalakna leh inpekna vangin inthlanna muanawm leh felfai tak tak neih a ni thin a ti.

Zawhna chhangin Commissioner chuan tun dinhmun ah LADC Inthlanpui neih huntur ah thutawp engmah siam a la nilo a ti a, Lai Autonomouss District

Council inthlanpui neih hnahnungber, kum 2020 ah khan December 4 ah Vote thlak niin December Ni 8 ah Vote chhiar a ni.

Commisioner hi Secretary Pu V.L. Remliana leh Dy. Secretary Pu Vanlalehhuanawma Chawngthu ten tawiaawmin, Lawngtlai District Election Officer, Bawrhsap Pu Donny Lalruatsanga leh District Election hotuten an tawiaawm.

<><><>

PARTY PR

BJP Mizoram State President Dr K Beichhua MLA chuan 'Special Assistance to States for Capital Investment' SASCI sum atanga Siaha tana hmasawna hna thawhna tur, cheng vbc 75 chu state sorkarin a chhuhsak vek a ti.

BJP Karthar inhlanna leh Political Session Aizawl-a an party office a neihah thusawiin Pu Beichhua chuan SASCI sum atanga State Sorkar sum hmuh cheng vbc 328 atanga Siaha district tana sum pek tur, Union Finance Minister ngeiin a pawmsak tawh cheng vbc 75 chu State Sorkar hnenah ziaak ngeia a thlensak pawh ngai pawimawh duh lova ZPM Sorkarin a chhuhsak vek chhan a hre duh a ti.

Central lam chuan State Sorkar hmalak dan an hriat mai bakah, annii pawhin State Sorkar hmalak duh dan chui Central Leader-te hnenah ziaak leh phone hmang pawhin an thlen nghal dawn a ti a, State Sorkarin hetiang rilru a put takah chuan Mizoram tana thil tha duh leh Mizoram hmangaihtu tan chuan kalphung thar kal dan chu an hrethiam tawh lova, engkim mai Politics a hnuhlulh a nih dawn chuan, hmalak a en vak a rin loh thu a sawi a ni.

Dr. K Beichhua chuan, Dampa bial By-Election an hmachhawn mekah hian Final Round an thleng ta tih sawiin tun kar chung hian Dampa bial tana BJP-in hmalak a tum dan la hre ve lo tam tak te hnena hrilhre turin Union Minister George Kurian hoin an nei leh dawn a ti.

Vawiin khan ZPM Thalai Headquarters ruahmannain, Dampa Bial Bye Election Street Campaign neih a ni a, Kanghmun, Lungphun, Khawrihnim, W Lungdar, Rulpuihlim, Khawrihnim, Chungtlangah te he campaignin Minister Pu Lalnghinglova Hmar leh MLA Pu Jeje Lalpekhlua te an kal a ni.

Pu Lalnghinglova Hmar chuan, Biak In chung pulpit a dinpui ngam leh tur Politics khelh tha a tih thu a sawi a, Politics-ah chuan inbeihna a awm thin a, chutiangah pawh chuan dawt phuah chawp hmanga in bei lovin, thu dik hmangin inbeih thin ni se a ti a, tunhnai ah eptu party candidate te'n Dampa bial mipuite hnenah an tih theih loh tur an tiam nasa hle a, state sawrkar hmanga tih theih tur ang te pawh an mahni mimal tih theih angin an tiam nasa a ni a ti.

Vawiin khan Mizo Hnam Rûna chung inkhawmah Mizo National Youth Front President Pu Robert Romawia Royte, MLA chuan thusawiin ZPM sorkar hnuaiah dan bawhchhiatna a nasa em em a, kuhva tawlhruk a hluar a, fertilizer tawlhruk chungchangah pawh Chief Minister a inrawlh nia sawi a nih thu leh, Dampa bial by-election campaign neih mekah pawh ZPM sorkar chuan nasa taka dan bawhchhiain, engah mah an ngai lo niin a lang a ti.

Pu Robert Romawia chuan Dampa mipui zingah ZPM hlawkpui an awm lo tih a sawi a; ZPM chuan buhfai man a letin an ti to a, electric bill a an ti sang nasa hle a,

Dampa bial kawng a chhe em em bawk tih sawiin FCAA 2023 chungchangah Mizoram hralh a ni, a ti a; Mizoram hralh a ni hian thalai tam tak, ram leh hnam hmangaihna kawngah a kaiharh tih a hriat thu a sawi bawk.

Vawiin Congress Bhavan Political Session-a thusawitu Pu Lalroenga, MPCC general secretary chuan tuna Congress party hruaitute chukawng hrang hrangah tuman an tluk lo a, khawtlangah experience nei tak tak leh Kohhran rawngbawltu deuh vek an ni, a ti a; tunah hian an party-ah hian khawvela thil har ber - hruaitu thlak an paltlang tawh thu leh Congress party-ah hian rinna nghah ngam a nih thu a sawi.

Pu Lalroenga chuan MNF hotu pawh chawl ngam tawh se a that a rinawm a ti a, MNF chu pawl thum ang deuhin an awm a, an in seh ve ngat ngat hlawm a ni a ti a.

ZPM party-ah pawh tunge thu ber tih a hriat theih loh thu sawiin Pu Lalroenga chuan, ZPM chu pawl naupangte, pawl hrang hrang thawkho kal buai tak an ni a, Chief Minister engkim a inrawlh vek an nei a, Minister ten an tlawn rawn tawh a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan India chu technology thar lo leitu chauh niloin hmasawwna ropui tak thlentu a ni tawh tih a sawi. Vawiina New Delhi-a Bharat Mandapam-a Emerging Science and Technology Innovation Conclave 2025 ah he thu hi sawiin Pu Modia chuan technology lama ram thanna chu nasa tak a nih thu a sawi a. Sawrakrin zirbingna lam research ah awlsam taka thiltih a nih theih nan hma alak thu sawiin ngaihtuahna thar hmang thei turin mithiamte tan remchang tha a siam zel a ti a. Khawvela digital public infrastructure hlawhtling ber din anih thu a sawi bawk a ni.

<><><>

TELANGANA

Telangana-a lirthei chesualah mi 19 an thi. Vanduaina hi Rangareddy district chhunga Mirjaguda-Khanapur inkar kawngah niin tukin dar 8 vel khan truck leh RTC bus an insu a. Cyberabad Police Commissioner Avinash Mohanty chuan hliam tuarte damdawiin hnaiah lak an nih thu a sawi.

President, Vice President leh Prime Minister ten vanduaina thleng pawl an tih thu leh mitthi chhungte an tawrhpuithu an sawi a. Prime Minister Modia chuan Prime Minister National Relief Fund atangin

mitthi chhungte hnenah cheng nuai 2 theuh pek anih tur thu a puang
nghal a. Hliam tuarte pawh cheng sing nga theuh pek an ni ang a ti
bawk.

<><><>